



# САМУРДИН

## сес

«Магьарамдхурун район» МР-дин общественно-политический газет.  
Общественно-политическая газета МР «Магарамкентский район».

Тешкилайди: «Магьарамдхурун район» МР.

Газет 1951- йисалай акъатзава. № 42 (7699) киш, 30-август, 2014- йис. Къимет 3 манат.

## 1- сентябрь чирвилерин югъ я



1- СЕНТЯБРДИЗ дагъдин ценеривай башламишна Каспий гъуле акъадалди райондин вири школайри чпин раklarар ахъайда- им клелдай цлийи йис башламишунин лишан жеда. И юкъуз 7800 аял партайрихъ ацукъда, абурукай 806 аял школайриз сифте кам вегъезвайбур я. Вири школайра 1700 малимди аялриз чирвилер гуда.

## МАЛИМРИН АВГУСТДИН АКТИВ



АДЕТ хъанвайвал, гъар йисуз августдин вацра райондин малимрин актив къиле тухузва. Алай йисуз и марекат 26-августдиз къиле фена.

Активдин ківалахда школайрин директоррини абурун заместителри, профкомрин председателри, ясли-бахчайрин заведующийри, район-

трдал алай са бязи идарайрин руководителри иштиракна.

## МЕСЭЛА КЪАРАГЪАРЗАВА



## ДЕГИШАРДАЙ ВАХТ АЛУКЪНАВА

РАЙОНДИН администрацияда райондин общественный Советди «Къетген къезилвилер авай агъалияр дарманралди таъминарун» темадай элкъвей стол киле тухвана. Гуьруьшда райондин общественный Советдин членрилай гъейри дарманралди таъминарунал машгъл учрежденирин, гъаки СМИ-рин векилри иштиракна.

Элкъвей стой киле фидайла агъалийрин къезилвилер авай категория дарманралди таъминардайла гьалтзавай татугай месэлайриз килигна. Элкъвей столдин иштиракчийри къейд авурвал, райондин къезилвилер авай агъалияр дарманралди таъминарунин карда адет хъанвай кимивал аптекайра чарасуз герек тир дарманар тахьун я. Абуру гзаф дуьшуьшра маса, тимилай таъсир ийидай дарманралди эвез ийизва. Гъа и карди агъалийрин патай наразивал арадал гъизва.

Социальный страхованиедин Фондунин региондин отделениедин Магъарамдухьурун районда авай уполномоченный Али Абдусамедова хабар гайивал, дарманрин чкадал гъар вацра пул къачузвай федеральный къезилвилер авай ксариз социальный къуллугърин кватлапни къачудай ихтияр ава. Иник ча-

расуз герек тир дарманралди таъминаруналди медицинадин пулсуз куьмек, гъаки медицинадин рекъий гереквал аваз гъисабайтла санатарно-курортный путевка къачудай, ракъун рекъин пригородный транспортда аваз, гъаки сагъардай чкадиз фидайла ва элкъвена квалитз хкедайла междугородный транспортда аваз пулсуз фидай ихтияр ава. Къезилвилер авай гзафбуру исятда соцпакет къачузвач, пулунин компенсация хкъазава. Абуру и кардин сеbeb аптекайра дарманар тахьун яз гъисабзава.

ЦРБ-дин къилин духтурдин заместитель Алзыра Широновади къейд авурвал, хци месэлайрикай сад социальный къуллугърин кватлап къачунин ихтияр хвенвай федеральный къезилвилер авайбуруз-1 ва 2- группайрин инвалидриз дарманар чара авунин месэла яз ама. Ихтинбур районда 770 кас ава. Кардик квай законодательстводихъ галаз къадайвал, ихтин агъалияр дарманралди пулсуз таъминарун патал вацра 679 манат чара ийизва. Амма гзаф уьзуьрар сагъар хъувун патал дарманриз са къадар гзаф пул харжна кланзава. И кар иллаки онкологиядин уьзуьрар квайбуруз, риклинни дамаррин системаяр уьзуьрлугъбуруз, бронхиальный астма, шекердин

диабет, дуркунрин уьзуьрар квайбуруз талукъ я.

-Исятда кардик квай системада, - 41-нумрадин аптекадин директор Эрзиман Кембералиева къейд авурвал, -къезилвилер гуналди дарманралди таъминарун патал чара ийизвай такъатар менфятсуз харж жезва. Гъа са азарлуди къведра ва я пудра финаанеламишун арадал къвезва. И такъатар здравоохранениедин системада амукънайтла, абуру азаррин вилик пад къун ва уьзуьрар сагъар хъувун патал кваллахдай.

Элкъвей столдин нетижаяр къуналди, райондин общественный Советдин председатель Агъадаш Нагъметуллаева къейд авурвал, къезилвилер авай агъалияр дарманралди таъминарунин исятда кардик квай системди къенин йикъан истемешунриз жаваб гузвач, я агъалийривай дарманар къачудай чпин ихтияррикай тамамвилелди менфятни къачуз жезвач.

Элкъвей столдин иштиракчийри рейсадвилелди къейд авурвал, къезилвилер авайбуру дарманралди таъминарунин система дегишардай вахт фидалай алукуьнава ва абуру гъа и месэладай вуч авун герек ятла чпин теклифар гана.

## ВЕЗИФА – ХАЛКЪДИЗ КЪУЛЛУГЪ АВУН

*РАЙОНДИН газетдин чинриз ярғал йисара уьмуьрдин имтигъанрай гьил-гьиле аваз экъечлай, дурумлу зегьметдалди хайи халкъдиз къуллугъ авур, баркаллу уьмуьр кечирмишай хизанрикай макъалаяр мукъвал-мукъвал акъатзава. Им акъалтзавай несил патал хъсан тарс, чешне жезва. Жегьиларни чпи кутунвай хизан хуьз, гьалтзавай четинвилериз таб гуз, жуван зегьметдалди квал-югъ кутаз алахъзава.*

КЪЕНИН зи ихтилат Советск хуьре яшамш жезвай Мамедгъусейноврин хизандикай ийиз кланзава. Хизандин кыл Мамедгъусейнов Сулейман Гъашимович 1950-йисуз Азербайжандин Агъадаш райондин Арабуджах хуьре хипехъандин хизанда дидедиз хъана. Гьелбетда, четинвилер гьеле аял вахтунилай гьалтна. Муьжуьд аял авай хизан будадихъ галаз санай-масаниз куьч жезвай. Ихътин шартлара са къулайвал жезвачиртлани, аялар гъвечи-члехид чидайбур, зегьметдин къадир авайбур яз члехи хъана.

Ялцугърин хуьруьн агъалийрихъ галаз 1952-йисуз Мамедгъусейноврин хизанни Советск хуьруьз куьч хъана. Ина хуьруьн школада 8-класс акъалтларай Сулейман Махачкъалада медучилищедиз гъахъна. Ам акъалтларайла къве йисуз Ватандин вилик вичин пак тир буржи аферин алаз тамамарна. Армиядай хтай жегьил пешекар Советск хуьруьн ФАП-дин заведующийвиле тайинарна. Вичел ихтибарнавай кар гъакъисагъвилелди тамамарзавай, члехи хуьре вири азарлуьрихъ вахтунда акакъзавай Сулейман Гъашимовича жемьатдин патай еке гъуьрмет къазанмишна. Вичин пешедин устадвал хкажиз, гъамиша вичел кваллахиз хъана.

Амма виридалайни лишанлу вакъиа адан уьмуьрда 1974-йисуз хъана. Малимвилин пеше хкянавай Кишмирадихъ галаз сир сад авуна мягъкем хизан кутуна. Ругуд йисуз халкъдин сагъламвилин къаравулда акъвазай Сулейман Гъашимович уьмуьрдин шартлар сеbeb яз медицинадивай къерех хъана. Ам гъа девирда районда квалквечи тир «Фрунзенский»



совхоздиз квалалахал фена. Ина ада гъар жуьре къуллугъар авуна. Гуьгъуьнлай ам кадрийрин отделдин начальник хъана. Кваллахдивай къерех тахъана Туладин сельхозакадемияни акъалтларна. Къилин кваллахдихъ галаз сад хъиз ада партиядин сифтегъан организациядин секретарвилин везифани тамамарна, муьжуьд йисуз хуьруьн Советдин депутатрин собраниедин председатель хъана. Къенин юкъузни хуьруьн депутат я. Ам сечкиьра, Вирироссиядин переписра активвилелди иштиракуниз килигна шумудни са гъуьрметдин грамотайриз, медалриз лайихлу хъана. Адахъ Россиядин Госкомстатдин председатель В.А. Соколинан тварунихъай ганвай наградаярни ава. И наградаярин арада «Магъарамдхуьруьн район вилик тухуник лайихлу пай кутунай, хуьрера муниципальный тешкилатар тешкилунин карда активвилелди иштиракунай» адан зегьметдиз райондин руководстводини еке къимет гана. Гъи фронтда зегьмет члугунатлани, Сулейман Гъашимовича бушвал авунач, ада вич халис женгчи тирди тистикъарна.

Ам са юкъузни кваллин, хуьруьн, обществодин месэлайривай къерех хъанач.

Хуси уьмуьрни хуси зегьметдалди къайдадик кутуна. Квал вичин зегьметдалди эцигна, багъ кутуна, веледар уьмуь-

рдин шегъредал акъудна. Текдиз ваь, уьмуьрдин юлдаш, лайихлу малим, хъсан тешкилатчи Кишмира Нуфеловнадихъ галаз санал. Къве руша Одиновода медсестраяр яз, са руша Самарада малим яз, хва Рената Советск хуьруьн школада социальный педагог яз квалалахзава. Гъвечи рушани социальный вуз акъалтларнава. Свас Анжеладини гъвечи классра авай аялриз тарсар гузва. Бубадинни дидедин гелерай физвай веледри намуслувилелди зегьмет члугвазва. Абуру Сулейман будадиз муьжуьд хтул багъишнава.

И йикъара Мамедгъусейноври хизан кутурдалай инихъ 40 йис тамам хъана. Абуру гъар жуьре хуш вакъиайрив, риклелай тефидай шад легъзейрив ацлай баркаллу уьмуьр кечирмишна. Къуй идалай къуллухъни куь уьмуьрда анжах хъсан квалалахар, шад мярекатар ва ихътин юбилеяр хъурай, гъуьрметлу Мамедгъусейноврин хизан!

**А. АЙДЕМИРОВА.**

**Шикилда:** Сулейман буба хизандин юкъва.

АЛИМДИХЪ ГАЛАЗ ГУЪРУЪШ

# АЛАМАТДИН ЧИРВИЛЕР АВАЙ КАС

## КУЪРУЪ СПРАВКА

**ХАЛИЛОВ Шагъвар Азимович 1950- йисан 10- сентябрдиз Сулейман-Стальский райондин Келед хуьре дидедиз хъана. Ина школадин 8- класс куътягъайдалай къулухъ, абурун хизан Уружбайрин хуьруьз куьч хъана. 1969- йисуз Уружбайрин хуьруьн юкъван школа келна куътягъайла вичин мурад къилиз акъудун патал ам Саратов шегъердиз хуьруьн майишатдин институтдиз гъахъна. Институт келна куътягъайла адаз алим-агрономдин диплом гана. Хуьруьз хтана «Правда» совхозда агроном яз кваллахна. Амма жегъилдиз келун давамариз клан хъана. И ният рикле аваз ам элкъвена Саратовдиз хъфена ва аспирантурадиз гъахъна. Гъа са вахтунда вичи келай хуьруьн майишатдин институтда малим яз кваллахни авуна. Аспирантура агалкъунралди куътягъна. 2002-йисуз адаз профессор лагъай твар гана. Алай вахтуна профессор, илимрин доктор Шагъвар Азимовича Саратовда Плеханован тварунихъ галай социально-экономический университетда кваллахзава.**

**Шагъвар Азимовичан лайхлувилер хуь-**



**руьн майишатдин илимрин доктор, профессор, РАЗН-дин член, Россиядин образованиедин министерстводин гъуьрметлу работник лагъай тварцелди, Генерал Чуйкован медалдалди лишанламишнава.**

И ЙИКЪАРА чун райондин Уружбайрин хуьруьн юкъван школа келна куътягъай ва гзаф йисар алатайдалай гуьгъуьниз машгур алим яз, мукъва-къилийрал са къил члугваз ва ял ягъиз хтанвай машгур алим ва дамах гвачир инсан ХАЛИЛОВ Шагъвар Азимовичахъ галаз гуьруьшмиш хъана.

Дуьз лагъайтла, зун и гуьруьшдиз виликамаз гъазурвал такуна, бейхабардиз ва тади кваз фенай. Зарафат туш, ихътин машгур, виниз тир дережадин алимдихъ галаз суьгъбет тешкилун жавабдар кваллахни я.

Амма зи къурхулувал бинесузди хъана. Шагъвар Азимович, сад лагъайди, вичин алимвилдин дережайриз тамашайла къадардилай гзаф простой инсан тир. Ада лезги члал хвенвай тегъердиз

тамашайла, заз ам лезги члалан тарсар гузвай малим хъиз хъанай. Къвед лагъайдини, адахъ вичихъ галаз суьгъбет ийизвай кас вичел желбдай алакун авай, и жигъетдайни ам пешекар педагогдиз ухшар тир.

Ахла ам, за гайи суалдиз жаваб гуз, хуьруьн майишатдин месэлайрал элячлайла, ада вич гуьле авай балугъди хъиз гъисс авуна. Зун патал тажублу кваллах ам тир хъи, и яргъи суьгъбетда хатадай къвани са урус гаф, вичин пешекарвилдиз хас махсус са термин акъатнач. Ара-ара зи сивяй акъатзавай урус гафари зак регъувал кутазвай.

Ихътин алимдин вилик завай заз кландайвал къулайдиз тухуз жезвачиртлани, зи рикле авай суал гуниз зун мажбур хъана: «Шагъвар

Азимович, чи газет келзавайбуру, иллаки АПКдин хиле кваллахзавайбуру фикир гузвай са месэла ава. Вучиз ятлани, эхиримжи йисара чи чили гузвай бегъерар виликдай гузвайбурулай зайиф я. Яраб себеб вуч ятла?

Аквадай гьаларай Шагъвар Азимовича вичиз и суал гун гуьзлемишзавай хъинди тир. И месэладай ада са куьруь суьгъбет авуна. Гьелбетда, адан суьгъбет завай газетдин чинра гъакъариз жедач, ам чахъ авай телевидениедин такъатралди агъалийрив акакъариз хъанайтла, хъсан, хийирлу жедай.

Алимди чин къун тавуна вичин рикле авайвал лагъана: «Суал дуьз эцигнава, адаз дуьз жавабни гун герек я. Тарар бегъердиз къведалди ва фад къурунин себеб

## АЛИМДИХЪ ГАЛАЗ ГУЪРУЫШ

питомникра битмишарзавай къелемар, майвайрин штилар ерисузбур ва чкадин гъвадин, цин, накъвадин шартларихъ галаз къан тийидайбур хъун, базаррал гъиз гузвай вуч хъайитлани къачун я. Хуъруън майишатдин хиле кваллахзавай пешекарри гуъзчивал тавун ва чкадин шартларихъ галаз къадай сортар хъя тавун я. Виридалай къилин себеб лежберрини фялейри виликдай хъиз жавабдарвилини гъисс рикле аваз кваллах тавун я. Тамаш садра, Магъарамдхуъруън районда агъзур гектарралди емишар, ципицлар, салан майваяр битмишарзава, а бегъерар вутлазава?

Суал тлал алайди я, вични тадиз жаваб истемишзавайди я. Жаваб ни гун лазим я. За чун къерех ийизвач, сифте нубатда чна- алимри. Абур киснавач. Чаз виридаз чизва, АПК вири серенжералди вилик тухунин къайгъуда Президентилай башламышна и месэла талукъ вири ава.

Чун патал садазни сир

туш, союз чкайдалай инихъ АПК гъихътин чкадал атанва? Чаз абурун къадар- гъисабни чизмач. Икъван гъаф продукция гъасилзавай члехи районда ам гъал авун патал, виликдай авай хътин шумуд завод эхцигна кланзава? Лугъун хъи, чарасуз къвед. Федерациядин ва Республикадин куъмек галачиз, райондин бюджетдин тлем акакьдай кар туш.

Ятлани, къейд авуна Шагъвар Азимовича, и йикъара райондин руководстводихъ- Фарид Загъидиновичахъ, Гъабибуллагъ Желиловичахъ галаз хъайи суъгбетдай малум хъайивал, мукъвал вахтара, вири къуватар желб авуна гъасилзавай продукция гъал ийидай такъатар кардик кутадай ниътар ава. И месэла РД-дин Къил Р. Абдулатипован гуъзчивиликни ква.

Заз алава хъийиз кланзава хъи, илимдин къуват екеди я, зун районэгъли яз, алим яз зи чалишмишвални жеда, амма чун пулунин такъатар гвай ксар туш.

Чун куъмекдин гаф гвай ксар я. И карда чи чалишмишвилер гъаф жеда. Районда авай гъар са карчидини, фермердини, пата-къерехра яшамиш жезвай, кваллахзавай ксарини чпин куъмекдин гъил яргъи авун герек я. Ингъе ачух мисал. Израилда авай са инвесторди Уружбадал къве виш касдиз кваллах жедай, къушарин як гъасилдай комплекс эцигиз башламышнава. Ихътин гъевеслу инсанар райондин руководстводи гъикъван гъаф желб авуртла, чи экономика гъакъван вилик фида, яшайиш гъакъван хъсан жеда.

«Самурдин сес» газетди чи районэгъли ва члехи алим Шагъвар Азимовичан фикирин тереф риклин сидкъидалди хуъзва.

**Р. МУРАДАЛИЕВ.**

**Шикилра: 4-чина: профессор Шагъвар Халилов. 5-чина: Ш. Халилов (чапла патахъай 3 лагъайди) мукъва-къилирин юкъва.**

**Р. ГЪАЖИЕВАН шикилар.**



## ХУЪРУЪН МАЙИШАТ

**ЧИЛЕЛ РИКИ АЛАЗ**

«ЧИЛ ишлемишзавайдан зегьметдихъ чина маса са республикадани авачир хътин игътияж ава. А зегьмет нетижалуди хъун патал чакъ вири шартларни ава. Кылди къачур са республикада авай хътин тлебиатдинни гъавадин, экономикадин, зегьметдин шартларин жуьреба-жуьревал, гъакӀ чуьллер, дуьзенар, дагъларин ценер ва дагълар санал къадайвал хъун бажагъат мад масанай жагъуриз жеда...»- кьейднай республикадин Кыл Р. Абдулатипова.

Чили къайгъударвал, гъавурда гъатун, иесивилин гъилер истемишзава. Инвестицийрин хъсан гъалар арадал гъун, инвесторар желб авун истемишзава. Абурни, сифте нубатда, чи райондин агъалийрин арадай желбун герек я.

Чи район лап фад девиррилай багъманчивилелди, уьзуьмчивилелди, фад битмиш жедай ва зулун майвайралди машгъур хъанва. Къе райондин чилел емишар ва майваяр битмишарун патал хсусиятчивилин вири жуьрейрин къуллугърин зегьметчийри гъакъсагъвилелди зегьмет чӀугвазва.

Чпин уьмуьр чилел зегьмет чӀугуниз бахшнавай инсанрихъ асуллу везифа ава-хуьр себеб яз культура ва адетар, чӀал, яшамиш хъунин тегъер... квадар тавунин мумкинвал амуькзава. И карни хсусиятчивилин гъвечӀи жуьрейрин булвал себеб яз жезва. Гъавилай, производстводин хилер жезвай къван гъафариз чалишмишни хъана кӀанда.

КӀвалахдин дуьз рехъ гъикӀ къада, бизнес-планар туькӀуьрун,



ва документар туькӀуьриз чирун, пешекарривай куьмек тӀалабун вучиз важиблу я? Чун феи «Ашага-Яраг» СПК-да, Гъепцегъ ва Советск хуьрерин арендадин майишатра, ОПХ «Красная Звезда» ГУП-да ва масанра чна гъа и месэлайр къарагъарна.

Гъа и месэлайрихъ галаз алакӀ-алу яз, тайин тир арендатордин-ОПХ «Красная Звезда» ГУП-дивай 2 гектар чил арендадиз къачуна хсуси такъатрихъ халидин сал кутур Абдулагъаев Жалилан зегьмет тешкилунал са тӀимил галай-галайвал акъвазиз кӀанзава.

Жалил Абдулагъаева Къаякентдай хъуьтлуьн халийрин гибридин элитный Топчан, Бомба, Амфион тумар ва гатун халийрин Лада, Дюна сортарин тумар маса къачуна. Тумар гъяркъуьвилел 70 сантиметр алай полиэтилендин пленкадин кӀаник цана. И къайда цӀийиди ва гележег авайди я. Ада яд къенятлуьвилелди ишлемишдай, алух акъалтун лап тӀимилардай мумкинвал гузва. Идалайни гъейри, полиэтилендин пленка ишлемишуни цанвай шейэр битмиш хъун 20 суткадин йигинарзава. Имани экономикадин важиблу нетижа я. Салахъ гелкъуьнин агрономический вири кӀвалахар хизандин гъилин зегьмет ишлемишуналди къиле тухузва.

Алава ем яз тӀебии миянардай шейэр (къушарин тӀекьер) чуькӀуруналди ва зиянкаррикайни азаррикай хуьн патал вилик пад къадай серенжемар къиле тухуналди арендатор Абдулагъаев Жалила хъсан бегъер къачуник гъахълуьвилелди умуд кутазва.

**Н. ВЕЛИЖАНОВ,**

«Информациядинни консультациядин къуллугъ» ГУ-дин Магъарамдхуьруьн филиалдин агроном, хуьруьн майишатдин илимрин кандидат.

## ДУХТУРДИ СУЬГЪБЕТЗАВА

**КАТАРАКТА**

КАТАРАКТА-им вилин шуьше хъиз аквадай пай са къадар ва я михъиз рагъул хъунин нетижада инсанрин ишигъ зайифарзавай ва я михъиз буьркъуь ийизвай уьзуьр я.

Катаракта-грек чӀалай таржума авурла « чарчар» лагъай чӀал я. Яни и уьзуьрдик азарлудаз вири шейэр авахъзавай цӀай хъиз, къацӀанвай гуьзгуьдай хъиз аквада. Уьзуьрдин сифте къилера «квинакс», «тауфон» витаминрин

стӀалар ишлемишунихъ метлеб ава. Алай вахтунда вилик пад къаз жезвач. Яш 40 йисалай алатнавай, вилерин зайифвал гъиссзавай вири агъалийри скрининг авун чарасуз я. Хаталубурун дестедик: шекердин диабет, ирсиная атанвай уьзуьрар квайбур, кӀвачел залан дишегълийриз вирусдин инфекцияр квай катаракта авай аялар хъун акатзава.

Шейэр хуш алаз акун, яргъа авай шейэр хъсандиз такун, мукъувай акун, айнаяр алачиз кӀелун вилерикай гъар жуьре

шейэр къарагъун, экуьникай кичӀевал хъун, аквазвай шейэр къвед хъун, рангар къатӀиз тахъун уьзуьрдиз хас лишанар я.

Ультразвукдин факоэмульсификация авуни катарактадин вилик пад къадай мумкинвал гузва. Идалай гъейри хирургдин сагъаруникай менфят къачуна кӀанда. Сагъар тавуни михъиз буьркъуь хъунал гъун мумкин я.

**Д. ЭМИРБЕКОВА,**

ЦРБ-дин офтальмолог.



## А Я Л А Р ЛИГИМАРДАЙ ВАХТ

ГАД! Гъихътин гуъзел ва вахт я, неинки аялар, гъакл члехибур патални кеф члугвадай вахт. Гъар са диде-бубади гатун мублагъ йикъара вичин велед мягъкем, лигим ва члехи хъуникай фикир ийизва.

Магъарамдхуъруън «Солнышко» бахчада гъа и кар патал вири шартлар яратмишнава. Иниз къвезвай аялри члехи пай вахт ачух гъавадал акъудзава. Бахчада аял неинки тлѐбиатдихъ галаз алакъада хъуниз, гъакл тлѐбиат туклуър хъанвай вири шейэрикай-чепедикай, накъварикай, къванерикай, цикай, къумадикай...чирвилер къачунизни фикир гузва. Чи аялар патал дидеярни галаз гуълел тухун иллаки яргълди риклел аламукъдай кар хъана.

И мукъвара чна бахчада физкультурадин «Салам, гад!» сувар тешкилна. Ам аялар патал риклел аламукъдайди хъун патал физрукар тир Ф. Ражабовади ва Ю. Къаинбеговади рикливай зегъмет члугуна. «День туриста», «Къумадин сувар»,

«Чун витаминар я», «Петрушка чаз мугъманда» машгъулатар аялрин лап рикл алайбур я.

Чи аялриз къайи цин «марф» иллаки хуш я. Им неинки хъсан къугъун, гъакл аялрин беден мягъкемарзавай карни я. Гъа и кардин гъакъиндай чи аялар лап къериз-цларуз азарлу хъунини шагъидвал ийизва. Аялар лигимарунин винел члехи медсестра С. Межидовади гуъзчивал тухузва.

«Солнышко» бахчада кардик квай 10 дестеда 242 аялдиз 30 пешекарди тербия гузва. Коллективди райондин, республикадин конкурсра иштиракзава. Ик алай йисуз республикадин конкурсда «Информационно-пропагандистская просветительная деятельность» номинациядай 2- чкадиз лайихлу хъана. Алатай йисуз «Безопасные дороги детям» лишандик кваз кыле феи конкурс-килигунра бахчадиз 2- дережадин диплом гана.

**Г. ШАГЪМАРДАНОВА,**  
«Солнышко» бахчадин  
тербиячи.

Нурудин НАСРУЛЛАЕВ

## ГЪАР СА РИКІЕ СА СИКІ АВА

*Шумудни са фенва асир,  
Члехи кылер хъанва есир:  
Сиквилерин хъанач къадар,  
Къанунрихъни авач гъунар.  
Алимрини къунва багъна:  
-Шейтандие гва сирер-чанта!  
Гъикл жен женчи тахъуй къаза.  
Гъар са рикле са сикл ава.  
Пачагъни гъим хъайитлани,  
Сиклрен руфун дулу жезва.*

## КЪВЕ КЪИЛ АЛАЙ ПАЯ

Гъикая

-Ваз за кабинетдин рак агална, япал клуф эдигна лагъанай: незвайди иливариз чир хъухъ, масадаз акъатиз тахъуй! Вуна пайдахдал пайда авуна, виридаз раижна!-гъарайзава члехида. -Гила вучда?! Къанунрин истемешунралди жаза къвезва ваз. Тахсиркардиз жаза це лагъанва виняй!

-Заз вучиз?! За ви буйругъар я кылиз акъудайди!

-Агала сив! Зи твар вучтинди я ви сиве авай?!

-Гъикл вучтинди я ?! Тахъайтла вуна тлуърдини заз хъакънавани?! Недайла къведани тлуъна, гила жаваб тек са за гудан?!

-Э-эй, зи твар къалурнавай са чкани авач, вун я жавабдар! Зи твар къадай садни хъунни авурди туш, я эсиллагъ жени ийидач!

-Гъикл жени ийидач, зун вуча, за лугъуда хъе-хъевал!

-Агала ви ткла лагъанай ваз! Пая ква ви чандик, пая!

-Члехиди, а паядихъ къве кыл авайди риклелай ракурмир, са кыл за акъуртла, мукуъ кыл ви юкъвалай фида!

-Ву-уч?! Фад зи вилерикай и кабинетдай садра!- акъудна къежел, хиялрик акатна члехиди: «Ихтибар алач и гъарамди тлуъна пицл вегъенвай къурумсахдал... Гъикин, вуж хъуй гъарайдиз гъай? ... Тахъайтла... кисна ацукъдани!»

# МАЛИМРИН АВГУСТДИН АКТИВ

1 ←

Активдин собрание «магъарамдхуьруьн район»МР-дин кыл Фарид Агъмедова тебрикдин гаф рахуналди ачухна ва доклад авун патал гаф УО-дин начальник Улубег Абейдуллаеваз гана. Ада алатай келунин йисан нетижайрин ва цийи йисуз вилик акъвазнавай везифайрин гъакъиндай гегъенш доклад авуна (доклад чи газетдин гуьгъуьнин нумрадиз гуда).

Докладдин винел рахай образованиедин министрдин

заместитель Назир Магъамедова, муниципальный райондин къаюмвилдин отделдин начальник Арсен Абасова, Магъарамдхуьруьн I-нумрадин дидедин члалан малим Анфиса Алибутаевади, РЦДТ-дин директор Альбина Гъуьсейновади, ОВД-дин ГИБДД-дин начальник Жабар Агъмедова цийи келунин йисуз гъазурвал акунвай гъалдин, вилик акъвазнавай хъууна кланзавай месэлайрин гъакъиндай чпин фикирарни лагъана ва райондин образованиедин хиле кваллахзавай вири работникриз алуькзавай келунин цийи йис тебрикна. М. Гъажиеван тIварунихъ галай школа-

дин пионерри шиирар келна. Активдал гъакI IV-межрегиональный конкурса гъалиб хъайи Анфиса Алибутаевадиз министрдин заместитель Назир Мегъамедова гъурметдин грамота ва цуьквер гана.

Собраниедин эхирдай рахун хъувур Фарид Загъидиновича школаяр цийи 2014 - 2015-келнин йисаз гъазурвал акунай образованиедин управлениеди ва школайрин педколлективри тухванвай кваллахриз рази жедай къимет гана.

**А. АЙДЕМИРОВА.**

## ФУТБОЛ - 2014



### «Леки» гъалиб хъана

РЕСПУБЛИКАДА футболдай сад лагъай чка патал кылин лигадин футболдин командайрин арада акъажунар давам жезва. 24-августдиз 8- тур кыле фена. «Лекиди» вичин стадиондал Буйнакск шегъердин «Темирханшура» команда къабулна.

Мачт кыляй-кылиз чи гадайрин къугъунин артуханвал аваз, ара датIана гъужумда аваз, саки мугъманрин пата кыле фена. Абуру акси гъужумралди жаваб гузвай. Нетижанда къугъун 2:0 гысабдалди акъалтIна.

Муьжуьд лагъай турдин къугъунрилай къулухъ «Леки» турнирдин таблицада 2- чкадал ала.

## Кваллах веревирдна

Магъарамдхуьруьн районада «Государстводин ва муниципальный къуллугъар авунин кваллах тешкилуни гъакъиндай» Федеральный закондин сергъятра аваз кыле тухузвай кваллах веревирд авунин заседание хъана.

Муниципальный райондин кыл Фарид Агъмедова кыле тухвай и мярекатда райондин идарайрин векилри ва МФЦ-дин ана авай филиалдин директорди иштиракна.

Гегъенш доклад кадрйрин кваллахдин ва информациядалди таъминарунин отделдин начальник Леонард Буржалиева авуна. Ада кылиз акъуднавай

кваллахрин ва вилик кумай месэлайрин гъакъиндай рекъемрал асаслу ихтилат авуна.

Л. Буржалиева къейдайвал, муниципальный идарайрин ва хуьрерин администрацийрин компьютеррал информация хаталувиликай хуьзвай махсус программаяр авач. Куьгъне хъанвай компьютеррин техника цийи хъувун кылин месэлайрикай сад тирди алава хъууна ада.

Мярекатдал маса идарайрин векилрини чпин фикирар лагъана ва эхирдай МР-дин администрацияди талукъ тир къарар къабулна.

Кылин редактор  
**А. ИСМАИЛОВ.**

Газет гъафтеда  
садра акъатзава.

Газет Магъарамдхуьруьн райондин администрацияда регистрация авуна.  
Регистрациядин № 301.

Редакциядин адрес: Магъарамдхуьр,  
Ленинан куьче, 4.

Телефонар: редактор- 25-1-37, жавабдар секретарь - 25-1-39, бухгалтер-25-9-69.

Чап ийиз вахкудай вахт - 16.00.

Чапун патал къул чIугуна- 15.00.

Газет ООО «Самур» типографияда гъазурна ва гъана чапна. 368780. Магъарамдхуьр, Ленинан куьче, 4. Лезги чIал.

Индекс 63340. Тираж 1280.  
Заказ № 42.

+7